

Malam Kesenian pembuka tirai ulang tahun ke-50 Pengajian Melayu NUS

SYAFIQAH MD ANUAR

JABATAN Pengajian Melayu Universiti Nasional Singapura (NUS) meraikan ulang tahunnya yang ke-50 tahun ini.

Jabatan itu ditubuhkan pada 1 Mac 1967, dan ketika itu diketuai Profesor Dr Syed Hussein Alatas.

Walaupun kecil berbanding jabatan yang lain, selama jangka masa 50 tahun Jabatan Pengajian Melayu NUS telah berjaya menumpukan fokus pada tiga aspek – pembangunan sosial, sejarah dan sastera.

Sempena detik bersejarah itu Jabatan Pengajian Melayu NUS akan menganjurkan sambutan dengan tema ‘50 Tahun Pengajian Melayu (MS50).

Dalam rangka sambutan itu, 11 mahasiswa daripada Persatuan Pengajian Melayu NUS

(NUSMSS) akan mengadakan acara seni “Mara: Malam Kesenian 2017”.

Seperti tahun yang sebelumnya, acara ini akan diadakan pada minggu pertama tahun akademik baru di NUS.

Tema bagi acara itu ialah “Mara – Dulu, Kini, Selamanya”.

Jawatankuasa berharap bahawa penonton dapat merasakan dan menyaksikan kemajuan yang dicapai Jabatan Pengajian Melayu NUS.

Ia juga berharap dapat menyatukan bukan sahaja mahasiswa daripada NUS tetapi juga alumni daripada jabatan Pengajian Melayu NUS

Antara persembahan menarik yang akan diadakan ialah persembahan dikir barat oleh pelajar Universiti Teknologi Nanyang (NTU), pertunjukan kompong oleh penuntut Universiti Pengurusan Singapura (SMU), dan persembahan tarian oleh pelajar Politeknik Ngee Ann (NP) dan banyak lagi.

Walaupun matlamat utama Malam Kesenian adalah mengemukakan pelbagai seni persembahan Melayu, acara dwibahasa Melayu dan Inggeris itu juga diharap dapat menarik penyertaan penonton bukan Melayu.

Pelbagai acara lain turut dirancang sempena MS50.

Ini termasuk Perasmian Kuliah Syed Hussein Alatas, Pameran Tembikar CITASENI, Persidangan Jubilee Pengajian Melayu dan banyak lagi.

Penganjur berharap acara yang diadakan itu dapat meningkatkan kesedaran tentang inisiatif MS50 dan Jabatan Pengajian Melayu NUS.

Acara Mara: Malam Kesenian 2017 akan diadakan pada 18 Ogos di Auditorium 2 University Town NUS.

► Penulis mahasiswa NUS